



Via s. Giachen el Grischun

Ina secunda conchiglia sin intschess da Mustér

■ (cp) Dacuort ei vegniu montau a Mustér in ulteriur simbol (s)per la via da s. Giachen de Compostela el Grischun. Giudem la scala – all'entrada dalla baselgia claustrala – ha l'Uniun da s. Giachen grischuna saviu metter si, cun lubientscha dalla claustra, ina conchiglia (Muschel) sco simbol e muossavia per tala via. La claustra da Mustér era el temps medieval liug da rimnada e partenza pils pelegrins da Santiago e deva era ora ils documents da recumandaziun.

La conchiglia avon claustra ei vegnida sponsurada dad in vischin da Mustér. Quella ei gia il secund segn da questa nova via da pelegrinadi medieval sin territori dalla vischnaunca. L'autra conchiglia secatta vid la caplutta da s. Giachen a Cuoz. Cunquei ch'ins ha fatg in sbagl enten marcar la via denter il center sportiv e Segnas, vegn la signalisaziun currigida el decuors dalla primavera, aschia che quella ei lu signada sco ella ei descretta el guid da viandar.

L'Uniun grischuna per la Via da s. Giachen ha fatg gronds sforzs ils davos onns per puspei metter neu e signalisar questa via tras il Grischun. Igl atun 2008 ha ins saviu inaugurar ella (la si-

gnalisaziun). La via da s. Giachen meina naven da Müstair sur Cuera si Mustér, da leu vinavon enta Tujetsch e surveni ad Amsteg el cantun Uri, nua ch'ella seligia cun la via da s. Giachen dalla Svizra centrala. Vul ins serender a Santiago de Compostela sa ins uss ir sin la via da s. Giachen che meina a Geneva e da leu tras la Frontscha tochen ellas Pireneas. Lu vai en Spagna tras il nord dalla tiara entochen Santiago de Compostela, damaneivel dalla Mar atlantica. 2010 ei in onn sogn a Santiago, perquei che la fiasta da s. Giachen, ils 25 da fevadur, croda sin ina dumengia. Tgi che vul ir quei onn a Santiago sto entscheiver uss a far las preparativas, pertgei ei vegn a dar fuolas da pelegrins e turists ord tut il mund.

La fin da 2008 ei era cumpariu il cudesch «Via Son Giachen» sco guid da viadi per la via grischuna. Ins sa retrer quel dalla casa editura Terra Grischuna ni dallas librerias. – Nus sperein che biars Grischuns, Grischunas ed auters selaschien animar da prender il fest da pelegrin entamaun ed il sacados si dies, entschevend il pelegrinadi cun caminar sin la via da s. Giachen tras il Grischun.

Aluis Deflorin

La Quotidiana 9.4.09